

SERLAHKAN KEINDAHAN MATEMATIK, HINDAR FOBIA FORMULA RUMIT - RAJA MUDA PERLIS

Oleh : Mohd Basri Basir

Bagi menarik minat pelajar terhadap Matematik, pendekatan pengajaran dan pembelajaran perlu diubah di mana terdapat persepsi Matematik sebagai subjek yang sukar.

Raja Muda Perlis, Tuanku Syed Faizuddin Putra Jamalullail bertitah, Matematik perlu diceriakan dengan pendekatan konsep, bukan dengan formula Matematik yang terlalu abstrak, agar 'ketakutan' terhadap Matematik dapat dikurangkan.

"Matematik adalah satu elemen yang sangat penting dalam pembangunan Sains, Kejuruteraan dan Teknologi. "Ingatlah, tanpa penguasaan yang baik dalam bidang ini, kita sukar menjadi pemegang dan pencipta teknologi," titah baginda.

Demikian titah Raja Muda Perlis Tuanku Syed Faizuddin Putra Jamalullail ketika berkenan berangkat merasmikan 'Majlis Penyampaian Hadiah Sempena Program Pi (p) Memorization Competition Perlis 2019' yang diadakan di Auditorium Perpustakaan Tuanku Syed Faizuddin Putra Universiti Malaysia Perlis (UniMAP) di kampus induknya di Pauh Putra petang semalam.

Berangkat sama ialah Raja Puan Muda Perlis, Tuanku Hajah Lailatul Akashah Khalil yang juga Pro Canselor UniMAP.

Keberangkatan tiba baginda disambut oleh Timbalan Naib Canselor (Akademik dan Antarabangsa) UniMAP, Prof. Ir, Ts. Dr. Rezuwan Haji Kamaruddin dan Ketua Juri merangkap Pengarah Program, Dr Mohamad Nazri Abdul Halif.

